

समाचार

- पेट्रोलियम अर प्राकृतिक गैस मंत्रालय कह्यो-देश मांय पेट्रोल-डीजल अर रसोई गैस लगातार मुहैया करावणो तैय करण सारू जरूरी जतन करी ज्या ।
- राजस्थान हाईकोर्ट एस.आई. भर्ती परीक्षा 2021 पूरी तरह रद्द करण रा हुकम दीना ।
- केंद्रीय महिला अर बाल विकास मंत्री अन्नपूर्णा देवी कह्यो- देशभर मांय दो लाख आंगनबाड़ी केंद्रां ने और बेहतर बनाया जा रह्या है ।

अर

- प्रदेश मांय आज ई केई ठौड़ां आंधी-बारिश- कोटा बूंदी, टोंक, दौसा अर श्रीगंगानगर जिलां मांय ओळा ई पड़्या ।

000

पेट्रोलियम अर प्राकृतिक गैस मंत्रालय जनता ऊं घबराहट मांय पेट्रोल-डीजल री खरीदी अर रसोई गैस री गैर-जरूरी बुकिंग नी करावण री अरज कीनी है। मंत्रालय रे मुजब पेट्रोलियम उत्पादां अर रसोई गैस लगातार मुहैया करावणो तैय करण सारू सगळा जरूरी जतन करी ज्या है अर पांच किलोग्राम गैस रा वजन वाळी टंकियां नजदीकी एलपीजी डिस्ट्रीब्यूटर कने मौजूद है। मंत्रालय रे मुजब पांच किलोग्राम री टंकियां री खरीदी सारू किंण ई पता रा सबूत री जरूरत नी है। मंत्रालय रे मुजब टंकियां री ऑनलाइन बुकिंग मांय 95 फीसदी री बधोतरी व्ही है अर काल रसोई गैस री करीब 51 लाख टंकियां ग्राहकां ने मुहैया करायी ज्यी। मंत्रालय रे मुजब तेल साफ करण रा सगळा कारखाना काचा तेल रा भण्डार सागे पूरा बूता ऊं काम कर रह्या है।

000

भारत रा झण्डा वाळो रसोई गैस ऊं भर्यो जहाज ग्रीन सानवी लड़ाई रा असर वाळा होर्मुज जल-डमरू-मध्य ऊं हिफाजत सागे पार कर र भारत आ रह्यो है। आतूणी एशिया मांय चाल रही लड़ाई बीचे होर्मुज जलडमरूमध्य ने पार करण वाळो ओ भारत रो रसोई गैस भर्यो सातवों जहाज है। फारस की खाड़ी हलका मांय मौजूदा बगत मांय भारत रा झण्डा वाळा 17 जहाजां मांय भारत रा चार सौ ऊं बत्ता नाविक सवार है। हाल तांई खाड़ी हलका ऊं भारत रा एक हजार 1 सौ 30 ऊं बत्ता नाविक हिफाजत सागे पाछा देश आ ग्या है।

000

राजस्थान हाईकोर्ट री खंडपीठ प्रदेश मांय पुलिस महकमा री मोटी भर्ती परीक्षावां मांय शामिल एसआई भर्ती परीक्षा-2021 पूरी तरह रद्द करण रा हुकम दीना है। हाईकोर्ट रा कार्यवाहक मुख्य न्यायाधीश न्यायमूर्ति संजीव प्रकाश शर्मा अदालत री एकलपीठ कानी ऊं 28 अगस्त 2025 ने सुणायी ज्या फैसला ने सही मानता थकां सरकार अर चुण्यी ज्या उम्मीदवारां री अपीलां खारिज कर दीनी। अदालत मान्यो के ई परीक्षा मांय मोटी तादाद मांय पेपरलीक, धांधली अर गडबडियां व्ही ही, जिण ऊं पूरी चयन प्रक्रिया गडबड व्हे ग्यी। अर्जी देवण वाळां रा वकील हरेंद्र नील फैसला रा बारा मांय और जाणकारी दीनी।

.....

एस.आई. भर्ती परीक्षा 2021 रद्द करण रा राजस्थान हाईकोर्ट रा फैसला रो कैबिनेट मंत्री डॉ. किरोड़ी लाल मीणा स्वागत कीनो है।

000

मिशन हरियाळो राजस्थान रा तैत राज्य मांय आवता चौमासा मांय 10 करोड़ पौधा रोप्या जावेला। मुख्यमंत्री भजनलाल शर्मा वन अर पर्यावरण विभाग रा अहलकारां सागे पौधारोपण, चंदन वन, नमो वन अर नमो नर्सरी बणावण रा बारा मांय राख्यी ज्यी मीटिंग मांय आ जाणकारी दीनी। वे कह्यो है के सरकार राज्य ने 'हरियाळो राजस्थान' बणावण माथे खास ध्यान दे रही है। वे कह्यो के पौधा रोपण रो काम विश्व पर्यावरण दिवस ऊं सरू कर्यो जावेला।

000

भारतीय जनता पार्टी रो 47वों स्थापना दिवस सोमवार ने राज्य मांय ई मनायो जावेला। ई मौके 5 ऊं 12 अप्रैल ताई प्रदेश रा जिला, मंडल अर बूथ लेवल माथे न्यारा-न्यारा कार्यक्रम राख्या जावेला। भाजपा रा प्रदेश महामंत्री श्रवण सिंह बगडी बतायो के काल ऊं 7 अप्रैल ताई जिला स्तर माथे भाजपा रा सगळा दफतरां ने फूलां अर रंगोली ऊं सजावण सागे सोहवणी रोशनी करी जावेला। स्थापना दिवस री पहली वाळी सांझ दीपोत्सव राख्यो जावेला। श्री बगडी बतायो के 6 अप्रैल ने स्थापना दिवस रे मौके जिला कार्यालयां माथे पार्टी रो झण्डो फहरायो जावेला।

-----

000

केंद्रीय महिला अर बाल विकास मंत्री अन्नपूर्णा देवी समाज मांय सकारात्मक बदलाव सारु सरकार अर समाज दोन्यु री भागीदारी जरूरी बतायी है। वे आज झुंझुनूं मांय खबरनवीसां सागे बातचीत कर रही ही। मंत्री अन्नपूर्णा देवी कह्यो के मिशन सक्षम आंगनबाड़ी अर पोषण 2.0 रा तैत दो लाख आंगनबाड़ी केंद्रां ने और बेहतर बणाया जा रह्या है।

-----

वे कह्यो के इण ऊं नान्हा बच्च्यां ने सरूआती तालीम सागे स्कूल रा वातावरण ऊं जोड़बा मांय मदद मिलेला। अन्नपूर्णा देवी कह्यो के महिलावां रा प्रति समाज री सोच मांय बदलाव जरूरी है। वे महिलावां रा मान अर हिफाजत सारु मिल र कोशिश करण माथे जोर दीनो।

000

प्रदेश मांय किताबां अर ड्रेस रा नाम परां विद्यार्थियां रा मायतां माथे माली बोझ डालबा वाळी गैर-सरकारी स्कूलां रे खिलाफ कार्रवाई करी जावेला। ई बारा मांय शिक्षा विभाग ब्लॉक लेवल माथे निगराणी समितियां बणा र स्कूलां री जांच करावण रा हुकम जारी कीना है। शिक्षा विभाग सगळा ब्लॉक शिक्षा अहलकारां ने आप-आप रा हलकां मांय गैर-सरकारी स्कूलां री जांच सारु टोळियां बणावण रा हुकम दीना है। ब्लॉक शिक्षा अहलकारां ने 15 अप्रैल ताई जांच पूरी कर र 20 अप्रैल ताई रपट देवणी व्हेला।

000

जैसलमेर रा पीएमश्री केंद्रीय विद्यालय बीएसएफ डाबला मांय आज पुस्तकोपहार कार्यक्रम राख्यी ज्यो। इण रो मकसद विद्यार्थियां मांय पठन-पाठन री रुचि विकसित करणो हो।

0000

लोकसभा अध्यक्ष ओम बिरला अर प्रदेश रा कृषि अर ग्रामीण विकास मंत्री डॉ. किरोड़ीलाल मीणा आज कोटा जिला रा इटावा-पीपल्दा हलका मांय करीब साढे तीन सौ करोड़ रुप्या रा खर्च वाळा विकास रा काम जनता ने संप्या। वे ढीपरी चम्बल नदी माथे 256 करोड़ रुप्या रा खर्च ऊं बणाया जावण वाळा पुल रा काम री नींव ई रखी। ई मौके बिरला कह्यो के 30 किलोमीटर रा दायरा मांय चार पुलिया बणावण ऊं सवाईमाधोपुर अर मध्यप्रदेश बीचे आवण-जावण और बेहतर बणेला। बिरला कह्यो के कोटडा ऊं दिल्ली महज साढे तीन घंटा अर मुंबई केवल 8 घंटा मांय पूग सकेला। लोकसभा अध्यक्ष कह्यो के रेल अर सड़क रे जरिए जुड़ाव बेहतर व्हेवण ऊं किसानां री उपज कुछ ही घंटां मांय देश रा मोटा बाजारां ताई पूगेला। वे आवता बगत मांय ई हलका रे खेती-किसानी आधारित उद्योगां रा मोटो केन्द्र रा तौर ऊं सामी आवण री आस जताई। हाल ही व्ही बेमौसम बरसात ऊं नुकसाण झेलबा वाळा किसानां ने सरकारी मदद रो भरोसो दिरायो। बिरला कह्यो के गेहूं रा नान्हा दाणा वाळी साखां री ई सरकारी खरीद री व्यवस्था करी जावेला।

-----

ई मौके कृषि मंत्री किरोड़ीलाल मीणा फसल बीमा अर मुआवजा रा मुद्दा माथे किसानां ने भरोसो दिरायो के किण ई सागे छलावो नी व्हेवण दियो जावेला अर दलालां ने खत्म कर्या जावेला।

000

प्रदेश मांय आज ई केई ठौड़ां ज़ोरदार बायरो बाजण सागे बिरखा व्ही। आज श्रीगंगानगर, बीकानेर, चूरु, दौसा, झुंझुनू, करौली, बारां, झालावाड़ अर कोटा समेत केई ठौड़ां आंधी चालण सागे छांटो-छिड़को व्ह्यो अर कठे-कठे ओळा ई पड़्या। आंधी-बारिश रे कारण प्रदेश रा घणखर हलकां मांय दिन अर रात री बगत पारो सामान्य ऊं 5-6 डिग्री सेल्सियस नीचे चाल रह्यो है। मौसम केंद्र जयपुर रा निदेशक राधेश्याम शर्मा सोमवार ऊं आंधी-बारिश रो दौर ओजू सरू व्हेवण रा आसार जताया है।

मौसम केंद्र किसानां ने पाक्योड़ी साखां ने हिफाजत ऊं राखण री राय दीनी है। ई बीचे आज दोपहरां पाछे कोटा, बूंदी, टोंक अर श्रीगंगानगर मांय बिरखा व्हेवण सागे ओळा पड़्या। अचानक बदल्या मौसम ऊं गर्मी ऊं साता मिली पण साखां ने नुकसाण री शंका है। मौसम विभाग आज राज्य रा 25 ज़िलां मांय आंधी चालण अर बिरखा व्हेवण सारू चेतायो है, जदके कठे-कठे ओळा पड़बा रा ई आसार है।

000

हनुमानगढ़ ज़िला रा गोलूवाला मांय आज चणा री सरकारी मोल माथे खरीदी सरू व्ही। ई मौके मण्डी मांय चणा री ढेरी ले र पूग्या किसानां रो माळा पहरा र स्वागत करी ज्यो। ई पाछे चणा री तुलाई अर खरीद रो काम सरू करी ज्यो।

0000